

李翰林集卷第十六

翰林供奉

登覽

登瓦官閣

登巴陵開元寺西閣贈衡岳僧方外

登單父陶少府半月臺

九日登巴陵置酒望洞庭水軍

登梅崗望金陵贈族姪高座寺僧中孚

登邯鄲洪波臺置酒觀發兵

秋登巴陵望洞庭



與夏十二登岳陽樓

登廣武古戰場懷古

登新平樓

紀南陵題五松山五首

陪族叔當塗宰遊化城寺升公清風亭

題瓜洲新河錢族叔舍人賁

題金陵王處士水亭

題東谿公幽居

題江夏脩靜寺

登錦城散花樓

登金陵鳳凰臺

朝下過盧郎中叙舊遊

尋魯城北范居士失道落蒼耳中見范置

酒摘蒼耳作

尋山僧不遇作

尋高鳳石門山中元丹丘

過汪氏別業二首

夜泛洞庭尋裴侍御清酌

至鴨欄驛上白馬磯贈裴侍御

初出金門尋王侍御不遇詠壁上鸚鵡

題宛谿館

荆門浮舟望蜀江

醉過謝安東山

秋登宣城謝眺北樓

醉題王漢陽廳

登金陵冶城北謝安墩

大庭庫

天台曉望

秋日登揚州西靈塔

望黃鶴樓

金陵望漢江

登敬亭北二小山

過崔八丈水亭

望木瓜山

樹席江山待月有懷

謁老君廟

登峨眉山

登瓦官閣

晨登瓦官閣極眺金陵城鍾山對北戶漢一作水入

南榮漫漫雨花落嘈嘈天樂鳴兩廊振法鼓四角吟

風華香出霄漢上仰攀日月行山空霸氣滅地古寒
陰生寥廓雲海晚蒼茫宮觀平門餘閭闔宇樓識鳳
凰名雷作百山動神扶萬拱傾靈光何足貴長此鎮
吳京

登巴陵開元寺西閣贈衡岳僧方外

衡岳有開一作士五峯秀真骨見君萬里心海水照
秋月大臣南溟去一作問道皆請謁灑以甘露言清
涼潤肌髮明湖落天鏡香閣凌銀闕登眺滄惠風新
花期啓發

登單父陶少府半月臺

陶公有逸興不與常人俱築臺像半月迥一作向高
城隅置酒望白雲商飈落寒梧秋山入遠海桑柘羅
平蕪水色淥且明令人思鏡湖終當過江去愛此暫
踟躕

九日登巴陵置酒望洞庭水軍時賊逼華容縣

九日天氣清登高無秋雲造化闢川岳了然楚漢分
長風鼓橫波合沓感龍文憶昔傳遊豫樓船壯橫汾
今茲討鯨鯢旌旆何繽紛白羽落酒樽洞庭羅三軍
黃花不撥手戰鼓遙相聞劒舞轉頽陽當時日停曛
酣歌激壯士可以摧妖氛齷齪東籬下淵明不足群

登梅崗望金陵贈族姪高座寺僧中孚

鍾山抱金陵霸氣昔騰發神開帝王居海色照宮闕
群峯如逐鹿奔走相馳突江水九道來雲端遙明沒
時遷大運去龍虎勢休歇我來屬天清登覽窮楚越
吾宗挺禪伯特秀鸞鳳骨衆星羅青天朗者獨有月
冥居順生理草木不剪伐煙窻引薔薇石壁老野蕨
吳風謝安屐白足傲履襪幾宿一下山一作下山來蕭然
忘干謁談經演金偈降鶴舞海雪時聞天香來了與
世事絕佳遊不可得春去惜遠別賦詩留巖屏千載
庶不滅

登邯鄲洪波臺置酒觀發兵時欲遊荆門

我把兩赤羽來遊燕趙間
天狼正可射感激無時閑
觀兵洪波臺倚劔望玉關
請纓不繫越且向燕然山
風引龍虎旗歌鐘昔追攀
擊筑落高月投壺破愁顏
遙知百戰勝定掃鬼方還

秋登巴陵望洞庭

清晨登巴陵周覽無不極
明湖映天光徹底見秋色
秋色何蒼然際海俱澄鮮
山青滅遠樹水綠無寒煙
來帆出江中去鳥向日邊
風清長沙浦霜空雲夢田
瞻光惜積髮閱水悲徂年
北渚旣蕩漾東流自潺湲

郢人唱白雪越女歌採蓮聽此更腸斷憑崖淚如泉
與夏十二登岳陽樓

樓觀岳陽盡川迥洞庭開鴈引愁心去山銜好月來
雲閒逢下榻天上接行盃醉後涼風起吹入舞袖迴
登廣武古戰場懷古

秦鹿奔野草逐之若飛蓬項王氣蓋世紫電明雙瞳
呼吸八千人橫行起江東赤精斬白帝叱咤入關中
兩龍不並躍五緯與天同楚滅無英圖漢興有來功
拔劍清八極歸酣歌大風伊昔臨廣武連兵決雌雄
八代一盃羹太皇乃汝翁爭戰有古跡壘壘積曾穹

猛虎吟洞壑飢鷹鳴秋空翔雲列曉陣殺氣赫長虹
撥亂屬豪聖俗儒安可通沉酒呼豎子狂言非至公
撫掌黃河曲啾啾阮嗣宗

登新平樓

去國登茲樓懷歸傷暮秋天長落日遠水靜寒波流
秦雲起嶺樹胡鴈飛沙洲蒼蒼幾萬里目斷令人
愁

紀南陵題五松山五首

一本併作一首

聖達有去就潛光愚其德魚與龍同池龍去魚不測
當時版築輩豈知傳說情一朝和殷人光氣爲列星

伊尹生空桑捐庖佐皇極桐宮放太甲攝政無愧色
三年帝道明委質終輔翼曠哉至人心萬古可爲則
時命或大謬仲尼將奈何鸞鳳忽覆巢麒麟不來過
龜山蔽魯國有斧且無柯歸來歸去來宵濟越洪波
陪族叔當塗宰遊化城寺升公清風亭

化城若化出金榜天宮開疑是海上雲飛空結樓臺
升公湖上秀粲然有辯才濟人不利已立俗無嫌猜
了見水中月青蓮出塵埃閑居清風亭左右清風來
當暑陰廣殿太陽爲徘徊茗酌待幽客珍盤薦雕梅
飛文何灑落萬象爲之摧季父擁鳴琴德聲布雲雷
雖遊道林室亦舉陶潛盃清樂動諸天長松自吟哀
留歡若可盡劫石乃成灰

題瓜洲新河錢族叔舍人賁

齊公鑿新河萬古流不絕豐功利生人天地同朽滅
兩橋對雙閣芳樹有行列愛此如甘棠誰云敢攀折
吳關倚北固天險自茲設海水落斗門湖平見沙汭
我行送季父弭棹徒流恍楊花滿江來疑是龍山雪
惜此林下興愴爲山陽別瞻望清路塵歸來空寂滅

一作

題金陵王處士水亭

此亭蓋齊朝南苑
又是陸機故宅

王子耽玄言賢豪多在門好鶴尋道士愛竹嘯名園
樹色老荒苑池光蕩華軒北堂見明月更憶陸平原
掃地青玉簞爲余置金樽醉罷欲歸去花枝宿鳥喧
何時復來此再得洗囂煩

題東谿公幽居

杜陵賢人清且廉東谿卜築歲將淹宅近青山同謝
眺門垂碧柳似陶潛好鳥迎春歌後院飛花送酒舞
前簷客到但知留一醉盤中只有水精鹽

題江夏脩靜寺

我家北海宅

此寺是李北海舊宅也

作寺南江濱空庭無玉樹

高殿坐幽人書帶留青草琴堂累素塵平生種桃李
寂滅不成春

登錦城散花樓

日照錦城頭朝光散花樓金牕夾繡戶珠箔懸瓊鈎
飛梯綠雲中極目散我憂暮雨向三峽春江遶雙流
今來一登望如上九天遊

登金陵鳳凰臺

鳳皇臺上鳳皇遊鳳去臺空江自流吳時花草埋幽
徑晉國一作衣冠成古丘三山半落青天外一作
水中分白鷺洲摠爲浮雲能蔽日長安不見使人愁

朝下過盧郎中叙舊遊

君登金華省我入銀臺門幸遇聖明主俱承雲雨恩
復此休浣時閑為疇昔言却話山海事宛然林壑存
明湖思曉月疊嶂憶青猿何當返初服田野醉芳樽
尋魯城北范居士失道落蒼耳中見范置酒

摘蒼耳作

鴈度秋色遠日靜無雲時客心不自得浩漫將何之
忽憶范野人閑園養幽姿茫然起逸興但恐行來遲
城壕失往路馬首迷荒陂不惜翠雲裘遂為蒼耳欺
入門且一笑把臂君為誰酒客愛秋蔬山盤薦霜梨

他筵不下筋此席忘朝飢酸棗垂北郭寒瓜蔓東籬
選傾四五酌自詠猛虎詞近作十日歡遠為千載期
風流自歎蕩謔浪偏相宜酣來上馬去却笑高陽池
尋山僧不遇作

石徑入丹壑松門閉青苔閑階有鳥跡禪室無人開
窺牕見白拂挂壁生塵埃使我空歎息欲去仍徘徊
香雲隔山起花雨從天來已有空樂好况聞青猿哀
了一作然絕世事此地方悠哉

尋高鳳石門山中元丹丘

尋幽無前期乘興不覺遠蒼崖渺難涉白日忽欲晚

未窮三四山已歷千萬轉寂寂聞猿愁行行見雲收
高松有好月空谷宜清秋谿深古雪在石斷寒泉流
峯巒秀中天登眺不可盡丹丘遙相呼顧我忽而哂
遂造窮谷間始知靜者閑留歡達永夜清曉方言還

過汪氏別業二首

遊山誰可遊子明與淳丘壘嶺礙河漢連峯橫斗牛
汪生面北阜池館清且幽我來感意氣槌炮列珍羞
掃石待歸月開池漲寒流酒酣益爽氣為樂不知秋
疇昔未識君知君好賢才隨山起館宇鑿石營池臺
大火五月中景風從南來數枝石榴發一丈荷花開

恨不當此時相過醉金壘我行值木落月苦清猿哀
永夜達五更吳歛送瓊盃酒酣欲起舞四座歌相催
日出遠海明軒車且徘徊更遊龍潭去枕石拂莓苔

夜泛洞庭尋裴侍御清酌

日晚湘水淥孤舟無端倪明湖漲秋月獨泛巴陵西
偶憩裴逸人巖居凌丹梯抱琴出深竹為我彈鷓鴣
曲盡酒亦傾北窻醉如泥人生且行樂何必組與珪

至鴨欄驛上白馬磯贈裴侍御

側疊萬古石橫為白馬磯亂流若電轉舉棹揚珠輝
臨驛卷綈幕升堂接繡衣情親不避馬為我解霜威

初出金門尋王侍御不遇詠壁上鸚鵡
落羽辭金闕孤鳴託繡衣能言終見弃還向隴西飛

題宛谿館

吾憐宛溪好百尺照心明何謝新安水千尋見底清
白沙留月色綠竹助秋聲却笑嚴湍上于今獨擅名

荆門浮舟望蜀江

春水月峽來浮舟望安極正見桃花流依然錦江色
江色綠且明茫茫與天平逶迤巴山盡搖曳楚雲行
雪照聚沙鴈花飛出谷鶯芳洲却已轉碧樹森森迎
流日浦煙夕揚帆海月生江陵識遙火應到渚宮城

醉過謝安東山

攜妓東山去悵然悲謝安我妓今朝如花月他妓古
墳荒草寒白雞夢後三百歲灑酒澆君同所歡酣來
自作青海舞秋風吹落紫綺冠彼亦一時此一時浩
浩洪流高詠何必奇

秋登宣城謝朓北樓

江城如畫裏山晚望晴空兩水夾明鏡雙橋落彩虹
人煙寒橘柚秋色老梧桐誰念北樓上臨風懷謝公

醉題王漢陽廳

我似鷓鴣鳥南遷懶北飛時尋漢陽令取醉月中歸

登金陵冶城北謝安墩

此墩即晉太傅謝安與右軍王羲之同登

超然有高世之志余將營園其上故作是詩

晉室昔橫潰水嘉遂南奔沙塵何茫茫龍虎闕朝昏
胡馬風漢草天驕感中原哲匠感頽運雲鵬忽飛翻
組練照楚國旌旗連海門西秦百萬衆戈甲如雲屯
投鞭可填江一掃不足論皇運有返正醜虜無遺魂
談笑遏橫流蒼生望斯存冶城訪古跡猶有謝安墩
憑覽周地險高標絕人喧想像東山姿緬懷右軍言
梧桐識佳樹蕙草留芳根白鷺映春洲青龍見朝暎
地古雲物在臺傾未黍繁我來酌清波於此樹石

作園功成拂衣去歸入武陵源

大庭庫

朝登大庭庫雲物何蒼然莫辨陳鄭火空羅鄒
魯煙我來尋梓慎觀化入寥天古木翔氣多松
風如五絃帝圖終冥沒歎息滿山川

天台曉望

天台鄰四明華頂高百越門標赤城霞樓樓滄
島月憑高登遠覽直下見溟渤雲垂大鵬翻波
動巨鼇沒風潮爭洶湧神怪何翕忽觀竒跡無
倪好道心不歇攀條摘朱實服藥鍊金骨安得

生羽毛千春卧蓬闕

秋日登揚州西靈塔

寶塔凌蒼蒼登攀覽四荒頂高元氣合標出海
雲長萬象分空界三天接畫梁冰搖金剝影日
動火珠光鳥拂瓊簾度霞連續拱張目隨征路
斷心逐去帆揚露浩梧楸白霜催橘柚黃玉毫
如可見於此照迷方

望黃鶴樓

東望黃鶴山雄雄半空出四面生白雲中峯倚
紅日巖巖行穹跨峯嶂亦冥密頗聞列仙人於

此學飛術一朝向蓬海千載空石室金竈生煙
埃玉潭秘清謐地古遺草木庭寒老芝木蹇予
羨攀躋因欲保閑逸觀竒徧諸嶽茲嶺不可匹
結心寄青松永悟客情畢

金陵望漢江

漢江廻萬里孤作九龍盤橫潰豁中國崔嵬飛
迅端六帝淪亡後三吳不足觀我君混區宇垂
拱衆流安今日任公子滄浪罷釣竿

登敬亭北二小山余時客逢崔侍御並

登此地

送客謝亭北逢君縱酒還屈盤戲白馬大笑上
青山迴鞭指長安西日落秦關帝鄉三千里杳
在碧雲間

過崔八丈水亭

高閣橫秀氣清幽併在君簷飛宛宛溪水窓落敬
亭雲援嘯風中斷漁歌月裏聞閑隨白鷗去沙
上自爲群

望木瓜山

早起見日出暮見棲鳥還客心自酸楚况對木
瓜山

掛席江上待月有懷

待月月未出望江江自流倏忽城西郭青天懸
玉鉤素華雖可攬清景不同遊耿耿金波裏空
瞻鳩鵲樓

謁老君廟

先君懷聖德靈廟肅神心草合人蹤斷塵濃鳥
跡深流沙丹竈滅關路紫煙沉獨傷千載後空
餘松柏林

登峨眉山

蜀國多仙山峨眉邈難匹周流試登覽絕怪安

可息青冥倚天開彩錯疑畫出冷然紫霞賞果
得錦囊術雲間吟瓊簫石上弄寶瑟平生有微
尚歡笑自此畢煙容如在顏塵累忽相失儻逢
騎羊子攜手凌白日

李翰林集卷第十六

李翰林集卷第十七

翰林供奉李白

歌吟

金陵歌送范宣

梁園吟

同族弟金城尉叔卿燭照山水壁畫歌

白毫子歌

峨眉山人月歌送蜀僧晏入中京

粉圖山水歌

元丹丘歌

鳴皋歌

襄陽歌

西岳雲臺歌送丹丘子

峨眉山月歌

鳴皋歌奉餞從翁清端五崖山居

永王東巡歌十一首

懷仙歌

勞勞亭

橫江詞六首

玉真仙人詞

侍從宜春苑奉詔賦龍池柳色初青聽新鶯百

轉歌

扶風豪士歌

上皇西巡南京歌十首

秋浦歌十七首

金陵西樓月下吟

赤壁歌送別

謝殷佐明見贈五雲裘歌

江上吟

玉壺吟

僧伽歌

臨路歌

山鷓鴣詞

和盧侍御通塘曲

歷陽壯士勤將軍思齊歌

江夏行

白雲歌送劉十六歸山

幽歌行上新平長史

金陵歌送范宣

石頭巉巖如虎踞凌波欲過滄江去鍾山龍盤走勢
來秀色橫分歷陽樹四十餘帝三百秋功名事跡隨
東流白馬小兒誰家子泰清之歲來關囚金陵昔時
何壯哉席卷英豪天下來冠蓋散為煙霧盡金輿玉
座成寒灰扣劍悲吟空咄嗟梁陳白骨亂如麻天子
龍沉景陽井誰歌玉樹後庭花此地傷心不能道目
下離離長春草送爾長江萬里心他年來訪南山皓
白骨一作之國

梁園吟

我浮黃河去京關挂席欲進波連山天長水闊厭遠
涉訪古始及平臺間平臺為客憂思多對酒遂作梁
園歌却憶蓬池阮公詠因吟淥水揚洪波洪波浩蕩迷舊
國路遠西歸安可得人生達命豈暇愁且飲美酒登
高樓平頭奴子搖大扇五月不熱疑清秋玉盤楊梅
為君設吳鹽如花皎白雪持鹽把酒但飲之莫學夷
齊事高潔昔人豪貴信陵君今人耕種信陵墳荒城
虛照碧山月古木盡入蒼梧雲梁王宮闕今安在枚
馬一本作表刺先歸不相待舞影歌聲散綠池空餘汴水
東流海沈吟此事淚滿衣黃金買醉未能歸連呼五
白一作行六博分曹賭酒酣馳輝歌且謠意方遠東

山高卧時起來欲濟蒼生未應晚

同族弟金城尉叔卿燭照山水壁畫歌

高堂粉壁圖蓬瀛燭前一見滄洲清洪波洶湧山崢嶸皎若丹丘隔海望赤城光中乍喜言一作嵐氣滅謂

逢山陰晴後雪迴溪碧流寂無喧又如秦人月下窺花源了然不覺清心魂祇將疊嶂鳴秋猿與君對此

歡未歇放歌行吟達明發却顧海客揚雲帆便欲因之向溟渤

白毫子歌

淮南小山白毫子乃在淮南小山裏夜卧松下雲朝

飡石中髓小山連縣向江開碧峯巉巖水遭迴一作淥水迴

余配白毫子獨酌流霞盃拂一作樓花弄琴坐青苔綠

蘿樹下春風來南窓蕭颯松聲起憑崖一聽清心耳

可得見未得親八公攜手五雲去空餘桂樹愁殺人

峨眉山月歌送蜀僧晏入中京

我在巴東三峽時西看明月憶峨眉月出峨眉照滄

海與人萬里長相隨黃鶴樓前月華白此中忽見峨眉

眉客峨眉月還送君風吹西到長安陌長安大道

橫九天峨眉月映秦川黃金師子乘高座白玉塵

尾談重玄我似浮雲滯吳越君逢聖主遊丹闕一振

高名滿帝都歸時還弄峨眉月

粉圖山水歌

峨眉高出西極天羅浮直與南溟連名公繹思揮彩
筆驅山走海置眼前滿堂空翠如何一作掃赤城霞
氣蒼梧煙洞庭瀟湘意渺綿三江七澤情洄洑驚濤
洶湧向何處孤舟一去迷歸年征帆不動亦不旋飄
如隨風落天邊心搖目斷興難盡幾時可到三山巔
西峰崢嶸噴流泉橫石蹙水波潺湲東崖合沓蔽輕
霧深林雜樹空芊綿此中冥昧失晝夜隱机寂聽無
鳴蟬長松之下列羽客對坐不語南昌仙南昌仙人

趙夫子妙年歷落青雲士訟庭無事羅衆嶺巖然却
在丹青裏五色粉圖安足珍真仙可以全吾身若侍
功成拂衣去武陵桃花笑殺人

元丹丘歌

元丹丘愛神仙朝飲潁川之清流暮還嵩峯之紫煙
三十六峯長周旋長周旋躡星虹身騎飛龍寧生風
橫河跨海與天通我知爾遊心無窮

鳴臯歌送岑徵君

若有人兮思鳴臯阻積雪兮心煩勞洪河凌競不可
以徑度冰龍鱗兮難容舸邈仙山之峻極兮聞天籟

之嘈嘈霜崖縞皓以合沓兮若長風扇海湧滄溟之
波濤玄猿綠罷絃談峯岌危柯振石駭膽慄鬼羣呼
而相號峯崢嶸以路絕挂星辰於巖巖送君之歸兮
動鳴臯之新作交鼓吹兮彈絲觴清冷之池閣君不
行兮何待若反顧之黃鶴掃梁園之羣英振大雅於
東洛中征軒兮歷阻折尋幽居兮越嶽寧盤白石兮
坐素月琴松風兮寂萬壑望不見兮心氛氳蘿冥冥
兮霰紛紛水橫洞以下淥波小聲而上聞虎嘯谷而
生風龍藏溪而吐雲寡鶴清唳飢鼯顛呻羸獨處此
幽默兮愀空山而愁人難聚族以爭食鳳孤飛而
無隣蝶躞嘲龍魚目混珍媼母衣錦西施負薪若使
巢由桎梏於軒冕兮亦奚異乎夔龍蹶躅於風塵哭
何苦而救楚笑何誇而却秦吾誠不能學二子沽名
矯節以耀世兮固將棄天地而遺身白鷗兮飛來長
與君兮相親

襄陽歌

落日欲沒峴山西倒著接羅花下迷襄陽小兒齊拍
手攔街爭唱白銅鞮傍人借問笑何事笑殺山翁醉
似泥鷓鴣杓鸚鵡孟百年三萬六千日一日須傾三
百盃遙看漢水鴨頭淥恰似蒲萄初醱醅此江若變

作春酒壘麴便築糟丘臺千金駿馬換少妾笑坐金
鞍歌落梅車傍側挂一壺酒鳳笙龍管行相催咸陽
市上歎黃犬何如月下傾金壘君不見晉朝羊公一
片石一本作晉朝羊公一片古碑材龜龍頭一作剥落生莓苔淚亦不
能為之墮心亦不能為之哀誰能憂彼身後事金甌
銀鴨葬死灰此二句無清風朗月不用一錢買玉山自
到非人推舒州杓力士鎗李白與爾同死生襄王雲
雨今安在江水東流猿夜聲

西岳雲臺歌送丹丘子

西岳崢嶸何壯哉黃河如絲天際來黃河萬里觸山

動盤渦轂轉秦地雷榮光休氣紛五綵千年一清聖
人在巨靈咆哮擘兩山洪波噴箭射東海三峯却立
如欲摧翠崖丹谷高掌開白帝金精運元氣石作蓮
花雲作臺雲臺閣道連窈冥中有不死丹丘生明星
玉女備灑掃麻姑搔背指爪輕我皇手把天地戶丹
丘談天與天語九重出入生光輝東求蓬萊復西歸
玉漿儻惠故人飲騎二茅龍天上飛

峨眉山月歌

峨眉山人月半輪秋影入平羌江水流夜發清溪向三
峽思君不見下渝洲

鳴臯歌奉餞從翁清歸五崖山居

憶昨鳴臯夢裏還手弄素月清潭閒覺時枕席非碧
山側身西望阻秦關麒麟閣上春還早著書却憶伊
陽好青松來風吹石道綠蘿飛花覆煙草我家仙翁
愛清真才雄草聖凌古人欲卧鳴臯絕世塵鳴臯微
茫在何處五崖原一作峽水橫樵路身披翠雲裘袖拂
紫煙去去時應過嵩少間相思為折三花樹

永王東巡歌十一首

永王正月東出師天子遙分龍虎旗樓船一舉風波
靜江漢翻為鴈鷺池

三川北虜亂如麻四海南奔似永嘉但用東山謝安
石為君談笑靜胡沙

雷鼓嘈嘈喧武昌雲旗獵獵過潯陽秋毫不犯三吳
悅春日遙看五色光

龍盤虎踞帝王州帝子金陵訪古丘春風試暖昭陽
殿明月還過鳩鵲樓

二帝巡遊俱未迴五陵松柏使人哀諸侯不救河南
地更喜賢王遠道來

丹陽北固是吳關畫出樓臺雲水閒千巖烽火連滄
海兩岸旌旗繞碧山

王出三江按五湖樓船跨海次揚都戰艦森森羅虎
士征帆一一引龍駒

長風挂席勢難迴海動山傾古月摧君看帝子浮江
日何似龍驤出峽來

祖龍浮海不成橋漢武潯陽空射蛟我王樓艦輕秦
漢却似天皇欲渡遼

帝寵賢王入楚關掃清江漢始應還初從雲夢開朱
邱更取金陵作小山

試借君王玉馬鞭拍麾戎虜坐瓊筵南風一掃胡塵
靜西入長安到日邊

懷仙歌

一鶴東飛過滄海放心散漫知何在仙人浩歌望我
來應攀玉樹長相待堯舜之事不足驚自餘崑崙直
可輕巨鼇莫戴三山去我欲蓬萊頂上行

勞勞亭

在江亭南十五里古送別之所一名臨滄觀

金陵勞勞送客堂蔓草離離生道傍古情不盡東流
水此地悲風愁白楊我乘素舸同康樂朗詠清川飛
夜霜昔聞牛渚吟五章今來何謝袁家郎苦竹寒聲
動秋月獨宿空簾歸夢長

橫江詞六首

人言橫江好儂道橫江惡一風三日吹倒山白浪高
於瓦官閣

海潮南去過潯陽牛渚由來險馬當橫江欲渡風波
惡一水牽愁萬里長

橫江西望阻西秦漢水東連揚子津白浪如山那可
渡狂風愁殺峭帆人

海神東一作來過惡風迴浪打天門石壁開浙江八月
何如此濤似連山噴雪來

橫江館前津吏迎向余東指海雲生郎今欲渡緣何
事如此風波不可行

日暈天風霧不開海鯨東感百川迴驚波一起三山
動公無渡河歸去來

王真仙人詞

玉真之仙人時往太華峯清晨鳴天鼓颯歛騰雙龍弄電
不輟手行雲本無蹤幾時入少廣一作室王母應相逢

侍從宜春苑奉詔賦龍池柳色初青聽新鸞

百轉歌

東風已綠瀛洲草紫殿紅樓覺春好池南柳色半青
青煙縈裊娜拂綺城垂絲百尺桂雕楹上有好鳥相
和鳴間關早得春風情春風卷入碧雲去千門萬戶

皆春聲是時君王在鎬京五雲垂暉耀紫清仗出金
宮隨日轉天迴玉輦遶花行始向蓬萊看舞鶴還過
蒹若聽新鷺新鷺飛繞上林苑願入簫韶雜鳳笙

扶風豪士歌

洛陽三月飛胡沙洛陽城中人怨嗟天津流水波赤
血白骨相撐如亂麻我亦東奔向吳國浮雲四塞道
路賒東方日出啼早鴉城門人開掃落花梧桐楊柳
拂金井來醉扶風豪士家扶風豪士天下奇一作意
氣相傾山可移作人不倚將軍勢飲一作酒豈顧尚
書期雕盤綺食會衆客吳歌趙舞香風吹原嘗春陵

六國時開心露膽君所知堂中各有三千士明日報
恩來是誰舞持長劍一揚眉清水白石何離離脫吾
帽向君笑飲君酒爲君吟張良未逐赤松去橋邊黃
石知我心

上皇西巡南京歌十首

胡塵輕拂建章臺聖主西巡蜀道來劍壁門高五千

仞一作尺石爲樓閣九天開

九天開出一成都萬戶千門入畫圖草樹雲山如錦

繡秦川得及此間無

德陽春樹似新豐行入新都若舊宮柳色未饒秦地

綠花光不減上陽紅

誰道君王行路難六龍西幸萬人歡地轉錦江成渭水天迴玉壘作長安

萬國同風共一時錦江何謝曲江池石鏡更明天上月後宮親得照蛾眉

濯錦清江萬里流雲帆龍舸下揚州北地雖誇上林苑南京還有散花樓

錦水東流繞錦城星橋北桂象天星四一作海此中朝聖主峨眉山上列仙庭

秦開蜀道置金牛漢水元通星漢流天子一行遺聖

跡錦城長作帝王州

水渌天青不起塵風光和暖勝三秦萬國煙花隨玉輦西來添作錦江春

劔閣重關蜀北門上皇歸馬若雲屯少帝長安開紫極雙懸日月照乾坤

秋浦歌一十七首

秋浦長似秋蕭條使人愁客愁不可度行上東大樓正西望長安下見江水流寄言向江水汝意憶儂不遙傳一掬淚為我達揚州

秋浦猿夜愁黃山堪白頭青溪非隴水翻作斷腸流

欲去不得去薄遊成久遊何年是歸日雨涕作
淚下孤舟

秋浦錦駝鳥人間天上稀山雞羞淥水不敢照
毛衣

兩鬢入秋浦一朝颯已衰猿聲催白髮長短盡
成絲

秋浦多白猿起騰若飛雪牽引條上兒飲弄水
中月

愁作秋浦曲一作客強看秋浦花山川如剡縣風
日似長沙

醉上山公馬寒歌竊成牛空吟白石爛淚滿黑
貂裘

秋浦千重嶺水車嶺最奇天傾欲墮石水拂寄
生枝

江祖一片石青天掃畫屏題詩留萬古綠字錦
苔生

千千石楠樹萬萬女貞林山山白鷗鳥一作鷺滿澗
澗白猿吟君莫向秋浦猿聲碎客心

邏人橫鳥道江祖一作胡出漁梁水急客舟疾山
花拂面香

水如一疋練此地即平天耐可乘明月看花上
酒船

爐火照天地紅星亂紫煙
敲郎明月夜歌曲動
寒川

白髮三千丈綠愁似篋長
不知明鏡裏何處得
秋霜

秋浦田舍翁採魚水中宿
妻子張白鵬結罝映
深竹

淶水淨素月月明白鷺飛
郎聽採菱女一道夜
歌歸

桃波一步地了了語聲聞
闕與山僧別低頭禮
白雲

金陵西樓月下吟

金陵夜寂涼風發獨上高樓望吳越
白雲映水
搖空城白露垂珠滴秋月月下沉吟久不歸
古
來相接眼中稀解道澄江靜如練令人還憶謝
玄暉

赤壁歌送別

二龍爭戰決雌雄赤壁樓船掃地空
烈火初張
照雲海周瑜於此破曹公君去滄江望澄碧
鯨

鯢唐突留餘跡一一書來報故人我欲因之壯
心魄

誦殷佐明見贈五雲裘歌

我吟謝朓詩上語朔風颭颭吹飛雨謝朓已沒
青山空後來繼之有殷公粉圖珍裘五雲色曄
如晴天散綵虹文章彪炳光陸離應是素娥玉
女之所為輕如松花落塗金一作粉濃成似一作苔
錦含碧滋遠山積翠橫海島殘霞一作花霏丹映
江紅一作草凝毫採掇似一作花霧露一作容幾年功
成奪天造故人贈我我不違著令山水含晴暉

頓驚謝康樂詩興生我衣襟前林壑斂暝色袖上煙
霞收夕霏群仙長歎一作驚此物千崖萬嶺相縈鬱
身騎白鹿行飄飄手翳紫芝笑披拂相如不足誇鸚
鵡王恭鶴氅安可方瑤臺雪花數千點片片吹落春
風香為君持此凌蒼蒼上朝三十六玉皇下窺夫子
不可及矯首相息空斷腸

江上吟

木蘭之枻沙棠舟玉簫金管坐兩頭美酒樽中置千
斛載妓隨波任去留仙人有待乘黃鶴海客無心隨
白鷗屈平詞賦懸日月楚王臺榭空山丘興酣落筆

搖五嶽詩成笑傲凌滄洲功名富貴若長在漢水亦
應西北流

玉壺吟

烈士擊玉壺壯心惜暮年三杯拂劍舞秋月忽然高
詠涕泗連鳳凰初下紫泥詔謁帝稱觴登御筵揄揚
九重萬乘主謔浪赤墀青瑣賢朝天數換飛龍馬救
賜珊瑚白再鞭世人不識東方朔大隱金門是謫仙
西施宜笑復宜頰醜女效之徒累身君王雖愛蛾眉
好無柰宮中妬殺人

僧伽歌

真僧法號號僧伽有時與我論三車問言誦呪幾千
徧口道恒河沙復沙此僧本住南天竺為法頭陀來
此國戒得長天秋月明心如世上青蓮色意清淨貌
稜稜亦不減亦不增瓶裏千年鐵柱骨手中萬歲胡
孫藤嗟予落魄江淮久罕遇真僧說空有一言懺盡
波羅夷再禮渾除犯輕垢

臨路歌

大鵬飛兮振八裔中天摧兮力不濟餘風激兮萬世
游扶桑兮掛石袂後人得之傳此仲尼亡兮誰為出
涕

山鷓鴣詞

苦竹嶺頭秋月輝苦竹南枝鷓鴣飛嫁得燕山胡馬
墜欲銜我向鴈門歸山雞程雉來相勸南禽多被北
禽欺紫塞嚴霜如劒戟蒼梧欲巢難背違我今誓死
不能去哀鳴驚叫淚沾衣

和盧侍御通塘曲

君誇通塘好通塘勝耶溪通塘在何處遠在尋陽西
青蘿嫋嫋柳煙樹白鷗處處聚沙堤石門中斷平湖
出百丈金潭照雲日何處滄浪垂釣翁鼓棹漁歌趣
非一相逢不相識出沒繞通塘浦邊清水明素足別

有浣沙吳女郎行盡綠潭潭轉幽疑是武陵春碧流
秦人雞犬桃花裏將比通塘渠見羞通達不忍別十
去九遲回偶逢佳境心已醉忽有一鳥從天來月出
青山送行子四邊苦竹秋聲起長吟白雪望星河雙
垂兩足揚素波梁鴻德耀會稽日寧知此中樂事多
歷陽壯士勤將軍名思齊歌

歷陽壯士勤將軍神力出於百夫則天太后召見
竒之授游擊將軍賜錦袍玉帶朝野榮之拜橫南
將軍大臣慕義結十友即燕公張說館陶公郭元
振爲首余壯之遂作詩

太古歷陽郡化爲洪川在江山猶鬱盤龍虎秘光彩
蓄洩數千載風雲何靈靈特生勤將軍神力百夫倍

江夏行

憶昔嬌小姿春心亦自持爲言嫁夫婿得免長相思
誰知嫁商賈令人却愁苦自從爲夫妻何曾在鄉土
去年下揚州相送黃鶴樓眼看帆去遠心逐江水流
只言期一載誰謂歷三秋使妾腸欲斷恨君情悠悠
東家西舍同時發北去南來不逾月未知行李游何
方作箇音書能斷絕適來往南浦欲問西江船正見
當壚女紅粧二八年一種爲人妻獨自多悲恹對鏡

便垂淚逢人只欲啼不如輕薄兒旦暮長相隨悔作
商人婦青春長別離如今正好同懽樂君去容華誰
得知

白雲歌送劉十六歸山

楚山秦山皆白雲白雲處處長隨君君長隨君君入楚
山裏雲亦隨君渡湘水湘水上女蘿衣白雲堪卧君
早歸

幽歌行上新平長史兄粲

幽谷稍稍振庭柯涇水浩浩揚湍波哀鴻酸嘶暮聲
急愁雲蒼慘寒氣多憶昨去家此爲客荷花初紅柳

條碧中宵出飲三百杯明朝歸揖二千石寧知流寓
變光輝胡霜蕭颯繞客衣寒灰寂寞憑誰暖落葉飄
揚何處歸吾兄行樂窮曛旭滿堂有美顏如玉趙女
長歌入綵雲燕姬醉舞嬌紅燭狐裘獸炭酌流霞壯
士悲吟寧見嗟前榮後枯相翻覆何惜餘光及棣華

李翰林集卷第十七